

A re-eligi Presidente di AVB, ing. Richard Dijkhoff como Vice-Presidente di Caribbean Football Union (CFU)

DIAHUEBS ultimo dia 8 di juli 2021 Caribbean Football Union a tene su congreso na JW Marriott na Miami. Ta despues di 22 luna cu e miembronan a topa atrobe personalmente. Durante e congreso aki e miembronan di CFU a eligi un Executive Committe (bestuur) nobo p'e proximo 4 añanan y na mes momento e re-eligi ing. Richard Dijkhoff, Presidente di Arubaanse Voetbal Bond, como miembro ehecutivo. El a haya e puesto di Vice-Presidente di CFU. Esaki ta un logro grandi. Mester mir'e cu banda cu Aruba tin un representante den e Executive Board di CFU, pa dirigi, administra y maneha futbol pa 31 isla den Caribe, cu e Arubiano aki ta re-eligi pa traha na bienestar di henter Caribe. Tur esaki a base di e bon trabou cu el a bin ta deplega den Caribe, aportando grandemente n'e desaroyonan positivo cu ta tumando lugar den Caribe, pero tambe p'e reconocimento cu su persona ta ricibi p'e desaroyonan positivo cu CFU ta experienciando den AVB y pa futbol na Aruba.

A reeligi e Presidente di AVB, ing. Richard Dijkhoff, entre otro p'e elogionan y reconocimentonan cu e federacionnan a dune' pa e cambianan cu e ta introduciendo riba diferente area den maneha, dirigi y administra futbol na Aruba, pero principalmente pa locual ta trata e 8 areanan cu AVB a identifica pa desaroya p'asina eleva e nivel di futbol den su totalidad na Aruba. E plan aki cu a haya e nomber di "Grow Football Aruba" y ta consisti di: 1. Club Development; 2. Coach Development; 3. Talent Development; 4. Women's Football Development; 5. Referee Development; 6. National Teams Development; 7. League Development; 8. Facilities Development. CONCACAF a adopta e plan integral aki cu e meta pa despues cu AVB caba di implement'e exitosamente, bou guia di mentor di CONCACAF, Etienne Siliee, lo implementa e plan aki den e 40 otro federacionnan den CONCACAF. Pues desaroyonan super positivo pa Aruba y e demas islanan den Caribe. E experiencia cu ing. Richard Dijkhoff a gana e ultimo añanan den AVB na Aruba, pero tambe trahando di cerca cu CONCACAF, FIFA y KNVB, a hacie un berdadero ehecutivo bon prepara den futbol pa henter Caribe. E organisacion Caribense como tal a mira e desaroyonan



aki cu a sosode bou su liderasgo y mesora a puntr'e pa comparti'e cu e demas islanan den Caribe. Dijkhoff ta convenci cu futbol ta uni pueblonan y na final ta crea lidernan den nos comunidnan. No mester mira futbol solamente como un deporte, sino henter e movimiento rond di dje ta haci'e mas cu djis skop bala. Ing. Richard Dijkhoff lo sigui traha na bienestar di futbol tanto internacional- y localmente tanten cu permiti'e pa sigui dirigi y crece futbol na Aruba. Un pabien grandi ta bay pa ing. Richard Dijkhoff, Presidente di AVB p'e logro aki y pa un biaha mas pone nomber di Aruba resona internacionalmente.